

四庫全書

史部

欽定四庫全書

汴京遺蹟志卷二十二

明 李濂 撰

藝文九

七言古詩

夷門

唐王維

七國雄雌猶未分，攻城殺將何紛紛。
秦兵益圍邯鄲急，魏王不救平原君。
公子為嬴停駟馬，執轡逾恭意逾下。
亥為屠肆鼓刀人，嬴乃夷門抱關者。
非但慷慨獻奇謀，

意氣兼將身命酬向風刻頭送公子七十老翁何所求

古大梁行

高適

古城莽蒼饒荆棘駐馬荒城愁殺人魏王宮觀盡禾黍
信陵賓客隨灰塵憶昨雄都舊朝市軒車照耀歌鐘起
軍容帶甲三十萬國步連營五千里全盛須臾那可論
高臺曲池無復存遺墟但見狐狸跡古地空餘草木根
暮天搖落傷懷抱撫劍悲歌對秋草俠客猶傳朱亥名
行人尚識夷門道白壁黃金萬戶侯寶刀駿馬填山丘

年代淒涼不可問往來惟見水東流

梁園吟

李白

我浮黃雲去京闕挂席欲進波連山天長水濶厭遠涉
訪古始及平臺間平臺為客愁思多對酒遂作梁園歌
却憶蓬池阮公詠因吟淶水揚洪波洪波浩蕩迷舊國
路遠西歸安可得人生達命豈暇愁且飲美酒登高樓
平頭奴子搖大扇五月不熱疑清秋玉盤楊梅為君設
吳鹽如花皎白雪持鹽把酒但飲之莫學夷齊事高潔

昔人豪貴信陵君
今人耕種信陵墳
荒城虛照碧山月
古木盡入蒼梧雲
梁王宮闕今安在
枚馬先歸不相待
舞影歌聲散綠池
空餘汴水東流海
沉吟此事淚滿衣
黃金買醉未能歸
連呼五白行六博
分曹賭酒酣馳輝
歌且謠意方遠
東山高臥時起來
欲濟蒼生未應晚

梁園歌送河南王說判官

岑參

君不見梁孝王脩竹園
頽墻隱隱鱗勢仍存
嬌娥曼臉成
草蔓羅帷珠簾空
竹根大梁一旦人代改
秋月春風不

相待池中幾度鴈新來洲上千年鶴應在

梁園中有鶴洲鴈池

梁

園三月梨花飛却似梁王雪下時當時置酒延枚叟肯
料平臺狐兔走萬事翻覆如浮雲昔人空在今人口單
父古來稱宓生祇今為政有吾兄

家兄時宰單父

輜軒若過梁

園道應傍琴臺聞政聲

梁臺古愁

李賀

梁王臺沼空中立天河之水夜飛入臺前鬬玉作蛟龍
綠粉掃天愁露濕撞鐘飲酒行射天金虎蹙裘噴血鮮

朝朝暮暮愁海翻長繩繫日樂當年芙蓉凝紅得秋色
蘭臉別春啼脉脉蘆洲客鴈報春來寥落野篁秋漫白

汴州亂二首

韓愈

汴州城門朝不開天狗墜地聲如雷健兒爭誇殺留後
連屋累棟燒成灰諸侯咫尺不能救孤士何者自興哀

二

母從子走者為誰大夫夫人留後兒昨日乘車騎大馬
坐者起趨乘者下廟堂不肯用干戈嗚呼奈汝母子何

按唐史汴州自大歷後多兵劉元佐死子士寧代之無度其將李萬榮逐而代之萬榮死董晉寔代之晉卒軍司馬陸長源總留後八日而軍亂殺長源愈是時已從晉喪出汴四日實貞元十五年也觀愈二詩蓋識當時姑息之政云

會飲金明池書事

宋司馬光

日華駘蕩金明春波光淨綠生魚鱗煙深草青遊人少
道路苦無車馬塵石渠諸君職事簡載酒擷花畏花晚

浮舟逐勝任所之箕踞狂歌叩舷板眼花耳熱氣愈豪
擲杯擊案聲嗷嗷驚沙颯颯繞洲渚魚龍遷去避我曹
人生大料無百歲貴賤賢愚同一致在家殺藪餘幾何
一日風光不宜棄

汴河

黃庶

汴都峩峩在平地宋恃其德為金湯先帝始初有深意
不使子孫生怠荒萬艘北來食京師汴水遂作東南吭
甲兵百萬以為命千里天下之腑腸人心愛惜此流水

不啻布帛與稻粱漢唐關中數百年木牛可以腐太倉
舟楫利今百於古奈何益見府庫瘡天心正欲醫造化
人間豈無鍼石良窟穴但去錢穀蠹此水何必求桑羊

弔故宮

元杜瑛

月上觚稜椒壁濕饑鳥啄碎琅玕石劫灰飛盡海揚塵
廢殿荒臺土花碧洛陽書生汴梁客一夜春風頭欲白
尊中賴有酒如泉醉倚寒窓破愁寂

信陵公子行

王惲

春風獵獵吹輕裘
聯鑣來作夷門遊
令人遠憶魏公子
徑上吹臺臺上頭
却秦存趙震九土
誰憶抱關老吏能
此帷幄之良籌
饑腸自古出奇策
功成何害屠沽流
高皇布衣重公賢
大梁城邊幾遲留
一朝龍驤開漢業
舉功不復詢來由
豈非慕蘭承餘休
嘗讀太史公今日
把酒酹墓周當時
朱門滿歌舞此日
野草荒山丘
醉歌信陵行
碧雲日暮寫我憂
英雄割據雖已矣
高義凜凜橫
清秋追攀逸駕
那復得落日倚
劒看神州

大梁行

明高啓

大梁四面平如砥西去咸陽一千里魏王此地昔為都
宮闕中天碧雲起車聲轆轤夜未休帶甲十萬名蒼頭
撞鐘列鼎宴上客奉金走幣連諸侯信陵真是賢公子
富貴不驕天下士已訪侯嬴到里門復迎朱亥經屠市
傾身折節世莫同緩急竟賴斯人功邯鄲秦軍一椎破
七國震動聞英風古城重過為搔首幾度秋風落楊柳
沼上應無鴻鴈來苑中只有狐狸走立馬塵沙日欲昏

悲歌感慨向夷門豪華多少同銷歇獨有高名今尚存

題汴城八景總圖

于謙

天風吹我來中州光陰荏苒春復秋民安物阜公事簡
目前景物隨冥搜梁園花月四時好日落夷山映芳草
大河滔滔湧地來騰波起浪如奔雷隋堤煙柳翠如織
鐵塔摩空數千尺陰晴晦明各異態對此令人感今昔
畫圖彷彿得真趣醉墨淋漓寫長句詩成掉筆向蒼空
滿袖天風却歸去

梁園歌

李夢陽

朝發金臺門夕度博浪關黃河如絲天上來千里不見
淮南山淮南桂樹弄婆娑掛席欲進阻洪波我今亦作
梁園歌梁園昔有信陵君名與岱華爭嵯峨三千珠履
不動色屠門執轡來相過功成不顯涕滂沱青蠅白壁
一何多我為梁園客不登梁王臺錦帆揚州門一去何
時迴荒煙白草古城沒登臺望之令心哀令心哀歌且
謠迷塗富貴苦不足寧思白骨生蓬蒿人生三十無少

年積金累玉空煎熬獨立天地間長嘯視今古城隅落
落一堆土千年誰繼白與甫攬淚浮雲灑煙莽灑煙莽
風吹卷波濤沉吟投箸不暇食蹴天濁浪何滔滔君不
見昔人然諾一相許黃金斗印如秋毫

觀燈行

詳見夢
華錄

李夢陽

宋家累葉全盛帝寬大實皆稱令主百姓牛馬徧阡陌
太倉米粟憂紅腐宣和以來遂多事嗚呼爛費如沙土
海石江花湧國門離宮別殿誰能數群臣諛佞祇自計

天下騷然始怨苦正月十四十五間有勅大駕觀鰲山
萬金為一燈萬燈為一山用盡工匠力不破君王顏此
時上御宣德門樂動簾開見至尊奔星忽經於御榻明
月初上堆金盆傾城呼譟聲動地可憐今夜鰲山戲窈
冥幻巧百恠聚金蛾翠管堪垂淚借問幸臣誰云是李
師師外有蔡京與蔡攸夾樓錦幄羅公侯丞相之幄當
前頭窺兒腰帶控紫騮如花少女擎綵毬但聞樓上喚
樓下黃帕籠盤賜玉羞月高鳴鞭至尊起幄中環珮如

流水爭道齊驅輦路窄寺橋窈窕塵埃白火樹龍燈又
一時千光萬焰天為赤常言晏安成禍基從來樂極還
生悲君看二帝蒙塵日數月東京荒蕪藜

大梁行

何景明

朝登古城口夕藉古城草日落獨見長河流塵起遙觀
大梁道大梁自古號名區富貴繁華代不殊高樓歌舞
三千戶夾道煙花十二衢合沓輪騶交紫陌鳴鐘暮入
王侯宅紅妝不讓掌中人珠履皆為門下客片言立賜

萬黃金一笑還酬雙白壁帶甲連營殺氣寒君王推轂
將登壇彎弧自信成功易拔劍那知報怨難已見分符
連楚越更聞飛檄救邯鄲一朝運去同衰賤意氣雄豪
似驚電楊花飛入侯嬴館草色淒迷魏王殿萬騎千乘
空雲屯綺構朱甍不復存夜雨人歸朱亥里秋風客散
信陵門川原百代重回首宋寢隋宮亦何有遊鹿時銜
內苑花行人尚折繁臺柳繁臺下接古城西春深桃李
自成蹊朝來忽見東風起薄暮飛花滿故堤

梁苑歌三首

王廷相

君不見梁王已破六國壘苑中便起文園臺黃金白玉
架樓閣綺榻延賓四向開清泠池上三尺雪相如新賦
傾鄒枚臨邛美人鬪花朵挑以琴心禮豈那漢庭賣賦
得千金白首遊梁計亦左今人空忤古人風抱策為儒
嘆不逢嗚呼古來文士不檢豈足病且覽詞彩如長虹

二

梁苑東連孟諸野舊國山高水彌下黃金觸斗不作樂

徒使千年笑達者君不見漢天子愛弟侈賜空大盈梁
王受之不一驚合沓金根車宛轉玻璃駟突然馳道流
日星千乘萬騎敵鹵簿貴焰豪華傾九瀛百年之後君
為誰有酒莫惜千金揮不信試看梁王苑狐兔草馳鬼
火吹

三

黃河東來沙填海陳留十山幾山在梁王古苑九地深
歲歲龍蛇窟穴改我田在苑苑在東灌園鑿井當其中

應門兩黃鶴抱琴雙玉童行歌曳杖如遊龍前身恐是
河上公君不見七十二帝如旋蓬惟有堯舜流高風人
生百年電閃閃何必希時釣譽攀援日月獨為功子雲
草玄恒不調虞卿著書仍固窮我懷欲附沙洲鴻

夷門歌

李濂

秦兵譟振長平瓦趙人肝腦塗原野邯鄲一夕陷圍中
魏軍不敢屯城下當時獨有信陵君門前劍舄多如雲
不有夷門抱關者誰知屠肆鼓刀人臥內虎符初入手

壯士胸中血一斗北救邯鄲西卻秦五霸之功今復有
平生志氣何雄豪功成刎頸如拔毛秋風弔古夷門道
惆悵荒城空綠蒿

五言律詩

晚入汴水

唐崔顥

昨晚南行楚今朝北汴河客愁能幾日鄉路漸無多晴
景搖津樹春風起棹歌長淮亦已盡寧復畏潮波

汴路即事

王建

卷二十二
千里河煙直青槐夾岸長天涯同此路人語各殊芳草
市迎江貨津橋稅海商因看故宮柳憔悴不成行

汴路水驛

王建

晚泊水邊驛柳塘初起風蛙鳴蒲葉下魚入稻花中去
舍已云遠問程猶向東近來雖怨別不與少年同

汴上暮秋

許棠

獨立長堤上西風滿客衣日臨秋草廣山接遠天微岸
葉隨波盡沙雲與鳥飛秦城寧有素志意自知歸

汴河路有感

白居易

三十年前路孤舟重往還
繞身新眷屬舉目舊鄉關
事去惟留水人非但見山
啼襟與愁鬢此日兩成斑

送開封盧少府

韋應物

雄藩車馬地作尉有光輝
滿席賓常侍闐街獨夜歸
關河征旆遠煙樹夕陽微
到處無留滯梁園花欲稀

春日遊金明池

宋李昭玘

日有江湖思坐無車馬塵
橫橋自照水啼鳥不驚人
輦

路晴飛絮宮牆暗鎖春多情老園吏灑地喜相親

宜春苑

王安石

宜春舊臺沼日暮一登臨解帶行蒼蘚移鞍坐綠陰樹
疎啼鳥遠水靜落花深無復增脩事君王惜費金

出舍利門

陳師道

十載都城客孤身冒百艱一饑非死所萬里有生還去
國吾何意歸田病不關共看雙白鬚似得半生閒

夏日汴中作

陳師道

倚棹望平野低雲密未收黃鸝度高柳歸燕拂行舟
濁水不堪照清江空憶遊晚晴蒸潤劇喘月見吳牛

中書省宿齋偶作二首

文彥博

齋潔奉祠事深嚴宿禁局露盤雲表見鈞奏夢中聽慎
獨虔君命清心重禮經顧慚溫室樹忽此集鷦鷯

二

鳳閣容棲集心無外慮侵夜涼秋氣早人靜禁門深大
政慚無補微才恐不任歌眠聽宮漏蘭燭照青衾

景靈宮宿齋謝雨

韓琦

邃寂敞僊局心齋物外清滂沱今應禱盼蠻貊通誠月
殿栖真境風梧醒睡聲如何謝靈貺至道本難名

正月三日與廣淵同出南薰門分趨齋宮塗中

成

司馬光

並轡出都門葱龍日欲昕野寒餘宿雪樹闇濕春雲稍
望郊宮近先愁馬首分一朝猶戀戀可復久離群

同樂園

元金師拓

晴日明華構繁陰蕩綠波蓬丘滄海遠春色上林多流
水時雖逝遷鶯暖自歌可憐歡樂極征鼓散雲和

登相國寺樓

明釋宗泐

冬日大梁城郊原四望平雲開太行碧霜落蔡河清欲
問征西路兼懷弔古情夷門名尚在無處覓侯嬴

繁臺春望

李夢陽

野曠孤煙靜高臺獨望時地殘隋氏苑天濶禹王祠晚
日雲爭白陰崖花自遲目斷南來鴈蕭然故國思

上方寺鐘樓

李夢陽

臺上一鐘鳴登臺萬里平
兼葭天正遠雲氣暮還生
饑雀喧空澤黃蒿斷古城
不堪臨眺屢況是感秋情

春日大梁東郭

李夢陽

桃柳清沙晚悵然悲遠春
葉明深坐鳥花劇轉愁人少
小追歡地乾坤放逐臣已看
共如此何惜醉遊頻

繁臺歸興

李夢陽

萬里竟何事三年違此都
短牆殘菊在別業古臺孤冬

日低簷塔霜風靜野蕪但看頭盡白莫恡酒重沾

吹臺訪川父讀書處

李夢陽

李生梁國彥少小事沉冥落日古臺上獨行楓樹青苔
侵映雪壁鳥下草玄亭野濶看無際浮雲似洞庭

吹臺酬空同子見訪之作

李濂

古臺讀書處長者命車來偶踐看花約因扳聽雨盃川
原餘戰伐文藻憶鄒枚並眺平蕪迴斜陽首重回

秋日吹臺讀書酬客過訪

李濂

斜日梁王苑西風古吹臺閉門秋思苦走馬故人來對
酒談丹訣哦詩步綠苔知君有高興涼夜不須迴

古臺秋望

李濂

何處看秋色城南登古臺憑高一以望幽思若為裁客
昔乘雲去人今聽鴈來浮生易衰白把酒重徘徊

春遊繁塔寺二首

李濂

少小曾遊地重來感慨深稚僧今老大落日更春陰廢
殿蒼苔合頽垣紫燕吟空餘舊時塔蔓草故蕭森

二

古臺白雲寺雲裏塔珠光春日停車客登遊樂未央題
詩留竹院醒酒坐松堂浪跡真堪笑招提亦醉鄉

登上方寺塔二首

李濂

寶塔憑虛起登遊但幾重中天近牛斗平地涌芙蓉
入黃河氣簷低少室峯妙高無上境臥聽下方鐘

二

塔影午氤氳名香八面聞盤梯失白晝絕頂俯層雲外

見蓮花色中藏貝葉文髻遊今不倦為喜出塵氛

登汴故城有懷宋事

李濂

無險難為國云何此帝州圖燕真失策徙洛是良謀花
石傾邦日金繒啖敵秋二龍生不返故國黍離愁

夷門

李濂

不聽侯生計胡收晉鄙軍卻秦功絕世存趙譽流芬故
址留殘礎遺墳鎖暮雲千秋豪俠氣吾愛馬遷文

繁臺春望


李濂

出城融雪盡觸目暖煙饒不到古臺上那知春色遙鄉
園仍節序身世且漁樵腸斷南天鴈群飛過洛橋

泛黃河

陸深

淼淼望不極連天送濁流浮沈經塞外淘洗向中州鷗
弄千帆雨沙明兩岸秋靈槎頻訊問乘興欲遨遊



汴京遺蹟志卷二十二

欽定四庫全書

史部

汴京遺蹟志卷二十三
四

詳校官左都御史_臣李綬

編修_臣程嘉謨覆勘

覆校官主事_臣龔敬身

校對官原任中書_臣徐步雲

謄錄監生_臣王貽桂

欽定四庫全書

汴京遺蹟志卷二十三

明 李濂 撰

藝文十

七言律詩

同陳留崔司戶早春宴蓬池

唐高適

同官載酒出郊圻
晴日東馳鴈北飛
隔岸春雲邀翰墨
傍簷垂柳報芳菲
池邊轉覺虛無盡
臺上偏宜酩酊歸
州縣徒勞那可度
後時連騎莫相違

黃河

羅隱

莫把阿膠向此傾此中天意固難明
解通銀漢應須曲纔出崑崙便不清
高祖誓功衣帶小僊人占斗客槎輕
三千年後知誰在何必勞君報太平

汴河

羅隱

當時天子事間遊今日行人特地愁
柳色縱饒粧故國水聲何忍到揚州
乾坤有意終難會黎庶無情豈自由
應笑秦皇用心錯謾驅神鬼海東頭

秋日汴河客舍酬友人

羅隱

梁宋追遊蚤歲同，偶然違別事皆空。
年如流水催何急，道似危途動即窮。
醉舞且欣連夜月，狂吟還聚上樓風。
煩君更枉騷人句，白鳳靈蛇滿袖中。

隋堤柳

李山甫

曾傍龍舟拂翠華，至今凝恨倚天涯。
但經春色還秋色，不覺楊家是李家。
背日古陰從此朽，逐波疎影向南斜。
年年只有晴風便，遙為雷塘送雪花。

又

秦韜玉

種柳開河為勝遊，堤前常使路人愁。
陰埋野色萬條思，翠束寒聲千里秋。
西日至今悲兔苑，東波終不返龍舟。
遠山應見繁華事，不語青青對水流。

下第後夷門乘舟至永城驛題

薛能

秋賦春還計盡違，自知身是拙求知。
惟思曠海為休處，忽喜孤舟似去時。
連浦一程兼汴宋，夾堤千柳雜唐隋。
從來此恨皆前達，敢負吾君作楚辭。

寄汴州令狐相公

王建

三軍江口擁雙旌，虎帳長開自教兵。
機鎖惡徒狂寇盡，思驅老將壯心生。
水門向晚茶商鬧，橋市通宵酒客行。
秋日梁王池閣好，新歌散入管絃聲。

約張處士遊梁

譚用之

莫學區區老一經，夷門關吏舊書生。
晉朝滅後無中散，韓國亡來絕上卿。
龍變洞中千谷冷，劒橫天外八風清。
好携長策干時去，免逐漁樵度太平。

送高別駕歸汴州

韓翃

信陵門下識君顏，驄馬輕裘正少年。
寒雨送歸千里外，東風沉醉百花前。
身隨玉帳心應慊，官佐銅符勢又全。
久客未知何計是，參差去借汶陽田。

汴河亭

許渾

廣陵花盛帝東遊，先擘崑崙一派流。
百二禁兵辭象闕，三千宮女下龍舟。
凝雲鼓震星辰動，拂浪旗開日月浮。
四海義師歸有道，迷樓還似景陽樓。

中秋夕寄大梁劉尚書

許渾

汴人迎拜洛人留虎豹旌旗擁碧油
刁斗嚴更軍耳目
戈鋌長控國咽喉柳營出號風生
纛縣蓮幕題詩月上樓
應念散郎千里外去年今夜醉蘭舟

彭門用兵後經汴路三首

吳融

長亭一望一徘徊千里關河百戰來
細柳舊營猶鎖月
祁連新塚已封苔霜飛綠野愁無際
燒接黃雲慘不開
若比江南更牢落子山詞賦莫興哀

二

隋堤風物已淒涼
堤下仍多古戰場
金鏃有苔人拾得
蘆衣無土鳥銜將
秋聲暗促河聲急
野色遙連日色黃
獨上寒城更愁絕
戍輦驚起鴈行行

三

鐵馬雲旗夢渺茫
東來無處不堪傷
風吹白草人行少
月落空城鬼嘯長
已見紛爭驚宇宙
可憐蕭索絕煙光
曾為塞北閒遊客
遼水天山未斷腸

駕幸西太乙宮遇雨

宋韓琦

曉蹕聲乾下九重
西郊岑寂歎琳宮
驕陽尚作三春旱
多稼期需一雨豐
恤物致虔歸上德
應誠為答即神聰
從來聖感無旋日
不在商巖傳說功

從駕過金明池

韓琦

帳殿深沉壓水開
幾時宸輦一遊來
春留苑樹陰成幄
雨漲池波色染苔
空外長橋橫蝘蝓
城邊真境闢蓬萊
匪朝侍宴臨雕檻
共看龍艘奪錦回

駕幸金明池

韓琦

西池風景出塵寰
春豫方乘禁座閒
庶俗一令趨壽域
從官齊許宴蓬山
樓臺金碧交輝外
舟楫笙歌浩渺間
與衆盡歡宮漏促
萬花叢裏屬車還

丙午上巳瓊林苑賜筵

韓琦

春光濃簇寶津樓
樓下新波漲鴨頭
嘉節難逢真上巳
賜筵榮入小瀛洲
僊園雨過花遺靨
御陌風長絮滾毬
禊飲不須辭巨白
清明來日尚歸休

西歸日瓊林苑賜宴即席賦此 文彥博

竊祿叨榮四紀餘
退思僥倖亦無如
趨朝再覩新宮省
解紱還歸舊草廬
報國丹心明皎皎
戀軒疲足去徐徐
群公盡出都門祖
盛事光於漢二疏

上元夜從駕至集禧觀 文彥博

順時同樂慰邦民
協氣和風應早春
斗運帝車遵大路
雲從天步絕纖塵
民瞻玉色欣遊豫
岳峙琳宮望省巡
回御端闈張鎬飲
蘭燈桂魄耀星津

赴集禧宮祈雪追憶從先皇駕幸泣然有感

歐陽脩

琳闕峒峒倚瑞煙，憶陪遊豫入新年。
雲深曉日開宮殿，水濶春風颺管絃。
千騎清塵回輦路，萬家明月放燈天。
一朝人事淒涼改，惟有靈光獨巋然。

崇政殿試賢良晚歸

歐陽脩

槐柳依依禁籞長，初寒人意自淒涼。
鳳城斜日留殘照，玉闕浮雲結早霜。
老負漁竿貪國寵，病須樽酒送年光。

歸來解帶西風冷衣袖猶霑玉案香

車駕朝謁景靈宮

歐陽脩

琳館清晨藹瑞氛玉旒朝罷奏韶鈞綠槐夾道飛黃蓋
翠輦鳴鞘向紫宸金闕日高猶泣露綵旌風細不驚塵
自慙白首追時彥行近儲胥忝侍臣

景靈宮致齋

歐陽脩

攝事衰年力不强誰憐岑寂臥齋房青苔點點無人迹
綠葉陰陰覆砌涼玉宇清風來處遠僊家白日靜中長

却視九衢車馬客自然顏鬢易蒼蒼

景靈宮奉迎仁宗皇帝御容有感

歐陽脩

行殿戔戔出綠槐琳宮芝闕聳崔嵬管絃飄落人間去
幢節疑從天上來基業百年傳聖子黔黎四紀樂春臺
孤臣不得同鉞虎未死心先冷若灰

和王景彞學士紫宸早謁

梅堯臣

朝開閭闔九重深望拜朱旒照玉簪霜氣稍迴龍陛峻

日光微轉鳳樓陰
庭中綵仗穿旗脚
案外薰爐對殿心
我預千官少裨補
欲將歌頌播堯音

和宋次道學士紫宸早謁

梅堯臣

陸生聲譽在雲間
來預簪裾謁帝顏
冠劍有容夔與禹
文章全盛馬兼班
眈眈玉宇龍纏棟
藹藹金鋪獸齧環
却出常衙殿前過
戟衣風動自相攀

和宋中道觀車駕朝謁景靈宮
梅堯臣

都人夾望禁槐旁
閭闔初來旭日光
彫玉翠鞍牽驤裏

盤龍朱輦爛文章焚香闕殿開嚴帳汲水寒溝灑廣莊
一見天顏萬人喜却迴宮禁樂聲長

和王景彝正月十六夜省宿過景靈街

梅堯臣

官街不閉東城月圓影纔虧夜色春自躍金羈來宿省
從他錦帳欲誇人燈光遠近疑爭晝歌韻高低競起塵
我老都無遊樂意似君清枕睡侵晨

愁臺

王安石

頽垣斷塹有平沙老木荒榛八九家
河勢東南吹地坼天形西北倚城斜
傾壺語罷還登眺岸幘詩成却嘆嗟
萬事因循今白髮一年容易卸黃花

金明池

王安石

宜秋西冠碧參差憶著鄉人袂
飲時斜倚水開花有思
緩隨風轉柳如癡青天白日春長好
綠鬢朱顏老自悲
跂馬未堪塵滿目夕陽偷理釣魚絲

又

王安國

霓旌遠遠拂樓船
滿地春風錦繡筵
三島路深浮閬苑
九霞觴滿奏鈞天
仗歸金闕浮雲外
人望瑤臺落日邊
最引平生江海趣
波瀾一段草如煙

又

王立之

遊絲隨絮惹行人
酒肆歌樓駐畫輪
鳳管遏回雲冉冉
龍舟衝破浪粼粼
日斜黃繖歸馳道
風約青帘認別津
朝野歡娛真有象
壺中要看四時春

遊玉津園

蘇軾

承平苑囿雜耕桑六聖臨民計慮長碧水東流還舊派
紫壇南峙表連岡不逢遲日鶯花亂空想疎林雪月光
千畝何時窮帝藉斜陽寂歷鎖雲莊

和宋次道太慶殿上元迎駕

司馬光

鳳律年華到尚新九重氣象已成春曉雲低拂羽林仗
宿雨先清紫陌塵玉殿鳴鞘傳警蹕彤庭委珮集簪紳
闕前無復魚龍戲自有驩謠億萬人

汴岸置酒贈黃十七

黃庭堅

吾宗端居叢百憂長歌勸之肯出游黃流不解澗明月
碧樹為我生涼秋初平群羊置莫問叔度千頃醉即休
誰倚柁樓吹玉笛斗杓寒挂屋山頭

幸太學倡和

篇什繁多不能盡
載畧錄七八首耳

呂大防

清曉金輿出建章祠宮轉仗指虞庠三千逢掖裾如雪
十萬勾陳錦作行再拜新儀瞻魯聖一篇古訓贊周王
崇儒盛世無云補扈蹕空慚集論堂

蘇頌

聖主恢儒率舊章首冬鳴蹕下膠庠師生褒博趨鱣序
文武端嚴列鴈行承詔敷陳商戊甲執經環立晉衣王
三千學者多才秀定有同升孔子堂

韓忠彥

恢崇儒教頓生光天子親來幸上庠星弁煌煌環帝座
霜袍密密綴周行廟祠稽首尊先聖書義終篇勸嗣王
學道深慙非入室此辰榮事預升堂

劉奉世

聖典垂精及表章曠儀親舉自宗庠縱觀橋擁浮雲蓋
待問庭充振鷺行首舉儒風隆上國增光帝業掩前王
太平榮遇慚多幸重見虞歌起廟堂

范純禮

四十餘年舊典章聖君今復幸虞庠虎賁萬騎森羅列
鴈序諸生儼綴行已見重華同舜帝不須無逸戒成王
祖宗基構隆三代統業相承是肯堂

吳安持

翰林墨客奏封章天子欣然幸國庠綵仗六龍初擁路
青衿三舍已重行隆儒共慶賢堯舜訪道誰知應帝王
附鳳騫淵皆法從獨慙由也亦升堂

豐稷

鳳幄雲開日月光九霄鳴蹕下虞庠朝元進士鴻成列
拱極名臣玉照行問道賈生稱五學乞言戴聖美三王
上心夙悟周公戒天下安危自一堂

李格非

日月天回十二章詔移清蹕幸膠庠六龍穩轉橋門曲
多士橫穿錦仗行俎豆威儀瞻闕里東西風教自周王
太平誰謂初無象四海形容在一堂

過龍德故宮

毛麾

萬里鑾輿去不還故宮風物尚依然四圍錦繡山河地
一片雲霞洞府天空有遺愁生落日可無佳氣起非煙
古來國破皆如此誰念經營二百年

讀靖康僉言

金元好問

浚郊沙海浩茫茫河廣纔堪一葦航顛沛且當懲景德
規模何必罪朱梁滄溟不掩蛟龍窟天地同歸雀鼠鄉
三百年間幾降擄長星無用出光芒

汴堤懷古

王良臣

迷僊樓觀鬱連空一日都歸鬼唾中奢則兆亡天聽邇
去而不返水流東鎖煙弱柳愁蛾綠閣雨幽花淚臉紅
總為錦帆歸不得至今啼鳥怨西風

龍德宮

雷瑄

紫簫吹斷碧雲歸十二樓空盡玉梯綵仗竟無金母降
僊裾猶憶化人携千年洛苑銅駝怨萬里坤維杜宇啼
莫倚危欄供極目斜陽更在露盤西

汴梁雜詩三首

李汾

琪樹明霞五鳳樓夷門自古帝王州衣冠繁會文昌府
旌戟森羅部曲侯美酒名謳陳廣座凝笳咽鼓送華輶
秦州王粲何為者憔悴囂塵嘆白頭

二

樓外風煙隔紫垣樓頭客子動歸魂
飄蕭蓬鬢驚秋色狼籍麻衣浣酒痕
天塹波光搖落日太行山色照中原
誰知滄海橫流意獨倚牛車哭孝孫

三

寥落關山對月明客窓遙夜夢魂驚
三年岐下音書絕八月河南風露清
冉冉暮愁生草色迢迢秋思入蟲聲
誰知廣武英雄嘆老却窮途阮步兵

資聖閣登眺

李獻甫

高閣凌雲眼界寬
野煙碧樹有無間
天邊孤鳥飛無盡
陌上行人去不還
魏國幾回時事改
汴堤千古夕陽閒
愁來重倚欄干望
松少西頭是故山

汴梁懷古

元傳與礪

汴上荒城繞故宮
山頭危石墮秋風
夷門市起聞嘶馬
梁苑樵歸見斷鴻
蘭草尚餘殘後碧
進花無復盛時紅
欲登高處腸先斷
滿目閒愁賦未工

又

雅勒呼

花石岡前麋鹿過中原秋色動關河欲詢故國傷心事
忍聽前朝皓齒歌蔓草有風嘶石馬荆榛無月泣銅駝
人間富貴皆如夢不獨興亡感慨多

又

元明善

天荒地老禁垣低草滿丹墀徑路迷金水河枯龍已去
蓬萊島圯馬空嘶當時何處安青瑣今日無門降紫泥
舉目山河增感慨英雄何在日還西

朝元宮留宿

李準

宋家天子朝元閣南內宮中太乙壇五夜星辰金榜動
九天風露玉階寒朱衣魚鬣迎笙鶴絳節龍光引佩鸞
八駿不歸遼海月步虛空遶紫雲端

登汴梁城

李準

天上曾聞玉輦過金城千里帶黃河鳳凰一去蓬萊苑
鴈鴛群飛太液波燈火樓臺空市井風雲冠蓋盡丘阿
惟餘畫角聲中調猶是流沙磧裏歌

雲驥橋

湯鼎

橋頭車馬鬧喧闐橋下帆檣見畫船
弦管隔花人似玉樓臺近水柳如煙
地連秦晉通三市路入淮濠接九天
獨倚闌干望宮闕翠微高映五雲邊

汴京懷古

李兩山

滄海成田艮岳荒誰能行役不徬徨
青城北狩隔萬里花石南來知幾綱
土暗塵昏天水碧風輕雨過女真黃
無人可語宣和事九些陳留酌一觴

登熙春閣

王惲

封丘門外故宮旁天閣空餘內苑荒瀛海夢空三島沒
帝城煙慘五雲蒼石鯨照水鱗猶動金鳳凌雲勢欲翔
奇貨梁園當日盡為誰留在閱興亡

哀故宮

王惲

掖庭依約粉垣丹行入荒宮重黯然華表忽驚人世換
昆明重見劫灰寒石龍委地埋秋草湖玉臨池倚暮煙
滿目悲風吹酒醒東華門外淚闌干

宿開封府後堂同陳侯話舊且及包范二公事

業子耳疾止酒談噓間暮雨大作

王惲

使軺南下入京華滿眼交親笑語譁共訝老螭蟠北海
自憐賤子宿南衙關河痛別襟期豁風雨翻空夜氣嘉
負殺清尊三百爵胡牀相對看簷花

汴上龍德故宮

陳孚

書來海上勸休兵已見金輿逐火精醺絕絳樓無鶴唳
朝空丹宸有孤鳴羽袍士尚傳三洞金帙人誰報六更

一代興亡真大夢陳橋驛畔見青城

登相國寺資聖閣

陳亨

大相國寺天下雄天梯縹緲凌虛空三千歌吹燈火上
五百纓縵煙雲中洛汭已掩西墜日漢津空送南飛鴻
闌干倚遍忽歸去颯颯雨鬢生秋風

又

許有壬

傑閣當年瑞靄飭亂餘金碧半塵昏豈知象教移中土
猶揭雄名護國門法界冷沉梁苑月寶香難返汝陽魂

傷心五嶺騰煙語舉世從風莫與論

遇僊樓

劉祁

倚天突兀聳高樓樓上人家白玉鉤落日笙歌迷汴水
春風燈火似揚州僊人已去名空在豪客同登醉未休
獨倚朱闌望明月鸞旌依約認重游

夷門

七國爭雄古戰場千年遺蹟已銷亡信陵謾有空名在
壯士猶聞俠骨香霜落大荒秋草白風生遠道暮塵黃

停車且醉夷門酒莫動悲歌易慨慷

隋堤

明釋宗泐

搔首隋堤落日斜已無遺柳可栖鴉
岸傍昔道牽龍艦河底今來走犢車
曾笑陳家歌玉樹却從后土看瓊花
四方正是無虞日誰信黎陽有鼓笳

讀靖康遺事

甘彥初

杜鵑啼老洛城東烽火郊畿縱犬戎
廟略合收淝水戰約盟誰定渭橋功
銅駝故陌迷秋草黃屋驚塵捲朔風

一自鼎湖龍去後小臣何地泣遺弓

汴京弔古

顧祿

北狩龍沙帝業空詞人猶解弔遺蹤
野燠蔓草感寧殿秋雨荒臺艮岳峯
一代已遷亡國鼎六更誰報早朝鐘
我來正值開天運真主曾經駐六龍

陳橋驛觀黃河

顧祿

浩浩黃流自古今晚停征騎發孤吟
水痕新漲桃花滿河脉元通瓠子深
三月魚龍爭變化四時鷗鳥任浮沉

誰能一駕僊槎去萬里靈源亦可尋

登相國寺藏經閣

顧祿

金碧稜層炫曉霞梵王高閣壯中華上摩絳闕三千界
下瞰紅塵十萬家伏虎神僧翻貝葉乘鸞僊女散瑤花
何因證得無生果來向雲中駕鹿車

遊上方寺

劉醇

重尋兜率路非遙柳外鳴珂散早朝鳥送好音風乍息
池添新水雪初消斷碑剝落生蒼蘚古塔崢嶸倚絳霄

珍重老僧相送遠笑談不覺度危橋

梁園

于謙

自古梁園佳麗地于今寂寞減繁華日長野店聞啼鳥
春暮山城見落花綠柳兩行侵洛遠黃河一帶入淮賒
欲將尊酒舒高興錦帳風流愧黨家

駐蹕堂

即布政司之圓堂

劉咸

先帝當年幸汴都六龍曾此駐鑾輿詞臣經進雲門樂
父老爭呈地理圖想像鎮旗成往事傷心遺詔載嘉謨

恭尋聖跡降臨處哭斷天涯望鼎湖

鄭門古城

劉咸

乘驄偶出鄭門西一上高城四望迷
千里雲霞山遠近萬家煙火屋高低
青城日落鴉爭聚白塔風高鳥亂啼
回首可憐梁苑地繁臺荒草冷淒淒

吹臺春日懷古

李夢陽

廢苑迢迢入草萊百年懷古一登臺
天留李杜詩篇在地歷金元戰陣來
流水浸城隋柳盡行宮為寺汴花開

白頭吟望黃鸝暮瓠子歌殘無限哀

元日繁臺寺集

李夢陽

臘凍雲黃海岳愁春青日白快吾遊
陰坡氣觸娟娟雪暖澤水分細細
流晨起探梅穿野寺晚來移席傍鐘樓
無端四望風煙起燈火煌煌滿汴州

雪後上方寺集

李夢陽

雪罷園林出碧梧上方樓殿靜虛無
日臨曠地冰先落雲破中天塔自孤
爛熳此堂人醉散一隻何處鶴來呼

邀留更待松門月今夜同君坐玉壺

河發秋望

李夢陽

七月七日河水發康王城邊秋可憐買魚沽酒此村口
打鼓鳴鑼何處船白晝蛟龍時一鬪中流日月晚雙懸
紛紛估客休回首漁子清歌會渺然

汴京懷古二首

李濂

渠花堤柳舊京都九帝承平王氣徂巢鳳閣空誰駐馬
臥牛城在自啼烏金繒不博燕雲地顚顚猶傳鄭俠圖

最恨翠華南渡日春風歌舞醉西湖

二

謾指黃河說宋朝繁華都向暮煙消遷都自祖曾謀洛
問鼎何人只伐遼忍見故宮皆碧草愁聞新法是青苗
當時誰倡和戎策鳳駕徒悲五國遙

艮岳懷古二首

李濂

宋帝平川起碧山綺甍瑤殿綵雲間祇矜花石來江艦
詎料金兵入漢關北狩竟隨雙鴈去中原無復二龍還

傷心一掬青城淚灑向遺宮草樹斑

二

誰言此地協堪輿詔築峯巒十里餘

宣和初道士劉混康言汴城東北地

協堪輿宜增築高阜當有多男之祥遂起艮嶽

朱勗自能移閬苑道君何必夢

華胥千夫石至籠黃帕萬歲山成切紫虛謾向舊都尋
舊蹟絳霄樓觀總丘墟

吹臺懷古

李濂

梁王昔日築高臺鼓吹華筵動地開五岳雲煙千里見

三川風雨半空來，綺羅春色今何在。
枚馬文章去不回，空有斷碑并廢苑。
秋風秋草使人哀。

禹廟

李濂

神禹祠堂水國潯，古臺落日樹鳴禽。
石門自有白雲宿，輦道空餘秋草侵。
四載巡遊天下計，九州粒食帝王心。
憑高一望河流穩，滿地桑麻聖澤深。

春日遊大道宮二首

李濂

僊闕宮堯紫氣分，洞天縹緲玉笙聞。
嵩山道士留丹竈，

南嶽夫人駐綵雲
瑤草石壇春漠漠
桃花谿路水沄沄
徘徊不盡尋真意
徙倚松門對鶴群

二

海上神僊十二樓
中原平地有丹丘
春壇風度鈞天曲
石壁雲開聚窟洲
絕粒餐霞空復想
吹笙騎鶴向來遊
憑君再訂花宮約
莫待西城碧樹秋

春日上方寺集二首

李濂

城裏招提此最幽
石壇晴日似丹丘
因看碧竹逢僧話

重惜青陽與客遊積雪洞門春寂寂閒雲塔院晚悠悠
淹留擊鉢成詩去慙愧文通擬惠休

二

古寺春寒花放遲春遊恐負看花期老無健足慵登塔
座有高賢喜賦詩蓮社舊容彭澤宰蒲團新識道林支
年來頗覺浮生幻欲扣旃檀細問師

秋日遊吹臺

李濂

古臺落木晚蕭蕭與客登臨旅思遙白日浮雲還自散

小山叢桂許誰招且將詞賦供秋興只恐疎慵負聖朝
回首不堪人事異碧山何處有漁樵

夏遊上方寺作

李濂

上方臺殿迴虛無避暑朝來坐日晡片片涼雲侵杖屨
悠悠疎梵出松梧徘徊塔院生秋思放浪乾坤有故吾
暫臥石牀聊一醉更於何地覓蓬壺

梁王臺

李濂

梁王臺下春草生梁王臺上春霞明兔園積雪有詞賦

鳬渚廢榭無歌笙百花雙燕且對飲碧海黃塵空復情
落日為誰吟思苦千秋城闕暮雲平

夷門即事答童太史

李濂

十年澤國嘯墟煙黃帽青鞵野興偏踏雪過村緣貰酒
隔溪遊寺為參禪信陵亭畔花爭發梁孝臺前月正圓
誰念夷門櫓散客白頭猶著紫霞編

延慶觀

李濂

曾聞汴水橋邊觀宋代朝元萬壽宮千樹碧桃今絕種

九光丹閣舊浮空
傷心莫問食霞事
謀國誰攄捧日忠
惆悵二龍終不返
三清臺殿夕陽中

秋日王別駕邀酌天王寺

李瀛

野寺邀賓發旆遲
杖藜出郭赴幽期
尊開竹院秋聲合
袂把松門暝色悲
別駕功名君勿薄
醉鄉日月我偏宜
相逢感慨無窮意
盡付東林碧玉巵

過汴梁有感

王雲鳳

霸主荒臺還突兀
隋堤殘柳正蕭疎
耕夫不識市朝處

野寺猶存宮殿餘
士慣悲歌豪俠地
土含腥血戰爭墟
抱城濁浪勞宸慮
漢策今慙總不如

行經隋堤有感

陸深

端委猶堪致太平
龍舟錦纜竟何成
空餘細水緣堤曲
別有垂楊帶晚晴
社燕歸來如有恨
閒花開遍不知名
行人誰管興亡事
但說揚州接汴京

汴京遺蹟志卷二十三

欽定四庫全書

汴京遺蹟志卷二十四

明 李濂 撰

藝文十一

五言排律

天章閣觀御書飛白十韻

宋韓琦

內閣開清曉中天對邇臣唐虞遺典在河洛奧書陳二
聖勤勞舊千齡矩法新帝暉方咫尺宸翰復躬親鸞拂
宮綃舞花隨御筆春奎光連壁府劒影動龍津今古神

功絕頒宣上意均
玉峯羅俎豆
黼座拱星辰
魚藻符亨會
蓬瀛寄此身
流霞僊飲罷
又賜一杯醇

黃河八韻寄呈聖俞

歐陽脩

河水激箭險誰言
航葦遊堅冰
馳馬渡伏浪
捲沙流樹落
新摧岸湍驚
忽改洲鑿龍
時退鯉漲潦
不分牛萬里
通槎漢千帆
下漕舟怨歌
今罷築故道
失難求灘急
風逾響川寒
霧不收詎能
窮禹迹空欲
問張侯

和歐陽永叔黃河八韻

梅堯臣

少本江南客今為河曲遊歲時憂漾溢日夕見奔流齧
岸侵民壤飄槎閣鴈洲峻門波作箭古郡鐵為牛目極
高飛鳥身輕不及舟寒冰狐自聽源水使嘗求密樹隨
灣轉長曾刮浪收如何貴沉玉川興是諸侯

金明池遊

梅堯臣

三月天池上都人袷服多水明搖碧玉岸響集靈鼉畫
舸龍延尾長橋霓飲波苑花光粲粲女齒笑嗟嗟行袂
相朋接游肩與賤摩津樓金間采幄殿錦文窠挈榼車

旁綴歸郎馬上歌川魚應望幸幾日翠華過

七言排律

汴州令狐相公新於郡內栽竹百竿圻壁開軒

旦夕對翫偶題七言五韻 唐白居易

梁王脩竹舊傳名久廢年深竹不生千畝荒涼尋未得
百竿青翠種新成牆開乍見重添興窓靜時聞別有情
煙葉蒙龍侵夜色風枝蕭颯弄秋聲更登樓望尤堪重
十萬人家無一莖

五日蔡河廢津泛舟

明李夢陽

當年錦纜帝王州，此日荒津競渡遊。
賓客未銷梁苑氣，江山聊寫汨羅愁。
流金赤日偏輸浪，似蓋輕雲故翼舟。
漁聽歌鐘沉復躍，燕窺舞袖去還留。
調冰雪藕佳人並，斷艾分蒲上客酬。
出溜只疑天上轉，汧洄真在鏡中浮。
陰陰暝色鳧鷖岸，嫋嫋風香杜若洲。
醉裏驚聞催住漿，別船追進夕筵羞。

早春相國寺雪集

李漁

冒雪尋幽入梵宮，凍雲臺殿暫停驄。
飛花撲面諸天外，素影侵盃浩劫中。
亂點袈裟堪作畫，密隨錫杖故翻風。
飄殘柳絮春猶淺，開遍梅花景不同。
郢客歌腔知獨妙，梁園賦筆許誰工。
寒天拉友瞻龍象，塵世勞生嘆蓼蟲。
酒半詼諧嘲佛印，詩成匆遽和天童。
自憐淨社攢眉客，元是康衢鼓腹翁。
坐濕巾袍吟更苦，起登樓閣興何窮。
須臾席上雙鉗盡，轉覺人間萬事空。
清逼塔光還簌簌，潤宜麥秀定芄芃。
無須泛艇尋安道，且聽鳴鐘謁遠公。

日暮醉歸誇勝會青蓮回首玉玲瓏

五言絕句

倉頡造字臺

唐岑參

野寺荒臺晚寒天古木悲空堦有鳥跡猶似造書時

登相國寺閣

劉商

晴日登臨好春風各望家垂楊夾城路客思逐楊花

都門路

宋司馬光

紅塵晝夜飛車馬古今迹獨憐道旁柳慘淡少顏色

汴上送客

梅堯臣

朝辭都城裏暮止汴堤頭
滿目非相親寂默對河流
舟中夜聽汴河水聲

梅堯臣

夏雨漲黃流夜鳴隣船柁
乘危冒險人不識西山餓
過廢牧苑

元趙子昂

一片中原地紛紛幾戰爭
至今將不去留與後人耕
錄汴梁宮人語十首

楊奐

一入深宮裏經今十五年
長因批帖子呼到御牀前

二

歲歲逢元夜金蛾鬧簇巾見人心自怯終是女兒身

三

殿前輪值罷偷去賭金釵怕見黃昏月殷勤上玉階

四

仁聖生辰節君王進玉卮壽棚兼壽表留待北還時

五

邊奏行臺急東華夜啟封內人催步輦不候景陽鐘

六

駕前雙白鶴日日候朝回自送鑾輿去經年更不來

七

為道圍城久粧奩擣鬪軍入春魂斷絕饑苦不堪聞

八

別殿弓刀響蒼黃接鄭王尚愁宮正怒含淚強添粧

九

一向傳宣喚誰知不復還來時舊鍼線記得在窓間

十

北去遷沙漠誠心畏從行不如當日死頭白若為生

上方寺

明李夢陽

飲罷塔廊坐塔深羅葉垂欲枕石頭臥待有清風吹

繁臺書院

李夢陽

書院今人蹟繁臺古代名樓花翻入燕塔樹不巢鶯

夷門懷古二首

王廷相

鬪雞纏紫羅彈箏住流水不見盛時人重過繁華市

二

華園明積雪上客艷新詞何處梁王苑秋風蔓草迷

汴州懷古五首

李濂

落日夷門道惟餘古堞雲猶懷抱關叟談笑卻秦軍

二

鄒枚不可見辭賦至今傳何處偏懷古梁臺日暮煙

三

出郭翠煙重遙聞野寺鐘堤邊逢父老閒說宋仁宗

四

近郭無山水春遊上吹臺平蕪猶自迴載酒獨徘徊

五

花石今何在孤城涕淚中金梁橋上月偏照宋遺宮

七言絕句

汴口懷古

唐杜牧

錦纜龍舟隋煬帝平臺複道漢梁王遊人還起前朝念
折柳孤吟斷殺腸

夷門

胡曾

六龍冉冉驟朝昏
魏國賢才杳不存
惟有侯嬴在時月
夜來猶自照夷門

汴河

胡曾

千里長河一旦開
亡隋波浪九天來
錦帆未落干戈起
惆悵龍舟更不迴

又

羅鄴

煬帝開河鬼亦悲
生民不獨力云疲
至今嗚咽東流水

似向清平怨昔時

又二首

皮日休

萬艘龍舸綠絲間
載到揚州盡不還
應是天教開汴水
一千餘里地無山

二

盡道隋亡為此河
至今千里賴通波
若無水殿龍舟事
共禹論功不下多

楊柳枝詞

劉夢得

煬帝行宮汴水濱
數枝殘柳不勝春
晚來風起花如雪
飛入宮牆不見人

汴河曲

李益

汴河東流無限春
隋家宮闕已成塵
行人莫上長堤望
風起楊花愁殺人

汴州聞角

武元衡

何處金笳月裏悲
悠悠遠客夢先知
單于城上關山曲
今日中原總解吹

黃河

宋邵雍

誰言為利多于害我謂長渾未始清
西至崑崙東至海其間多少不平聲

集禧宮謝雨

歐陽脩

十里長街五鼓催泥深雨急馬行遲
臥聽竹屋蕭蕭響却憶滁州睡足時

初春登興國寺塔

司馬光

雨過風清露氣勻林花變色柳條新
為君作意登高處

試望皇州表裏春

九日賜宴瓊林苑作

王安石

金明馳道柳參天
投老重來聽管絃
飽食大官還惜日
夕陽臨水意茫然

題中書壁

王安石

夜開金鑰名詞臣
對御抽毫布帝綸
須信朝家重儒術
一時同榜用三人

樊樓

即豐樂樓汴京酒樓也在城內

劉子翬

梁園歌舞足風流美酒如刀解斷愁憶得承平多樂事
夜深燈火上樊樓

玉津園

劉敞

垂楊冉冉籠清籞細草茸茸覆白沙長閉園門人不入
禁渠流出雨殘花

過朱亥墓

黃庶

枯林寒草墓丘墟等是當年一丈夫地下若知應笑死
衣冠今日有屠沽

和江鄰幾送客回同過金明池二首

梅堯臣

送別西亭車馬塵
天池回傍欲迷津
畫船龍尾何時發
丹杏稍頭漏泄春

二

風光猶未老於人
獸口泉聲瀉碧津
一洗塵襟無俗慮
柳條開眼共看春

京師逢賣梅花三首

梅堯臣

北土只知看杏藥大梁亦復賣梅花此心還似庾開府
不惜金錢買取誇

二

驛使前時走馬迴北人初識越人梅清香莫把茶蘼比
只欠溪頭月下盃

三

此去吾鄉二千里不看素萼兩三年移根種子誰辛苦
上苑偷來直幾錢

過仁宗陵

劉信叔

千戈消弭歲豐登
邊將無功更不能
四十二年那忍說
西風吹淚過昭陵

梁臺

金完顏璫

汴水悠悠蔡水來
秋風古道野花開
行人驚起田間雉
飛上梁王鼓吹臺

相國寺鐘

祝簡

寒雞縮頸未鳴晨
已聽春容入夢頻
未必佛徒知警悟

祇能喚起利名人

龍德故宮

辛愿

蛇分鹿死已無秦五十年來漢苑春
問著流鶯無一語
柳條依舊拂牆新

梁園春三首

元好問

雙鳳簫聲隔綵霞
宮鶯催賞玉谿花
誰憐利澤門前柳
瘦倚東風望翠華

二

暖入金溝細浪添
津橋楊柳綠纖纖
賣花聲動天街遠
幾處春風揭繡簾

三

上苑春濃晝景閒
綠雲紅雪擁三山
宮牆不隔東風斷
偷送天香到世間

雪香亭雜詠八首

亭在故汴宮
仁安殿西

元好問

落日青山一片愁
大河東注不還流
若為長得熙春在
時上高層望宋州

二

金縷歌辭金屈卮百年人事鬢成絲
重來未必春風在更為梨花住少時

三

滄海橫流萬國魚茫茫神理竟何如
六經管得書生下濶劍長鎗不信渠

四

羅綺深宮二十年更持桃李向誰妍
人生只合梁園死

金水河邊好墓田

五

萬戶千門盡有名
眼中歷歷記經行
賦家正有蕪城筆
一片傷心畫不成

六

暮雲樓閣古今情
地老天荒恨未平
白髮累臣幾人在
就中愁殺庾蘭成

七

琵琶心事曲中論
曾笑明妃負漢恩
明日天山山下路
不須回首望都門

八

爐薰裊裊帶輕陰
翠竹高梧水殿深
去去旂車雪三尺
畫羅休縷麝香金

黃河

元陳孚

千載金湯擁上流
只今惟有荻花秋
江南客子笑無語
閒看黃河繞汴州

朱僊驛

陳孚

城郭重來事已非
南薰不掩柳依依
當時大慶蒼虬礎
留與田家夜搗衣

汴學

洪熒祖

朝元競詫新宮麗
相國猶存古寺雄
壁水枯荷人不到
石經零落臥秋風

題萬歲山圖

元明善

萬歲綱船出太湖
九朝膏血一時枯
阿誰種下中原禍

猶自昂藏入畫圖

徽廟走馬溝中得古銅燈盞

剝盡金銅土色如幾經溝底引鑿興君王無復重遊幸
留與山人照讀書

汴城士人家翫小石峯

天星何代墮虛空化作玲瓏一小峯自是宣和殿中物
上頭銘刻護雙龍

觀宋徽宗宸翰

宋家宗社已丘墟萬里中原百戰餘
玉輦不知何處去
人間留與瘦金書

題宋故宮

郝經

國是當時已盡非
強將商鞅作臯夔
莫言天變渾無畏
不見雷轟黨籍碑

艮岳

李孝光

一沼何堪役萬民
一峯將使九州貧
江山假設方成就
真箇江山已屬人

龍德宮

王惲

當年陸海駭珍藏此日繁華墮渺茫
春草不隨人事換依然分翠入宮牆

汴梁故宮寒食

王惲

人家賣酒繞宮池爭插青旗曲作圍
簫鼓漸多寒食近一樽先為典春衣

熙春閣

王惲

傑閣當年宴御頻鼎煙未盡慘兵塵
土堦三尺茅茨底

人自熙熙物自春

梁園對月

王惲

兒時曾住汴梁城二十年來重此行
一片鳳凰池上月
向人還似舊時明

宿開封後署

王惲

拂拭殘碑覽德輝
千年包范見留題
驚烏繞匝中庭栢
猶畏霜威不敢棲

詠鎮旗

明顧祿

按河南總志國初皇祖駐蹕開封駕回勅留大旗
卓于行宮之高臺以鎮中原

禁闕重重鎖不開當年曾駐六龍來鎮旗留在人瞻仰
高颺宮中百尺臺

黃河舟中

于謙

順風吹浪片帆輕頃刻奔馳十數程舵尾吹煙猶未熟
船頭已見汴梁城

宋宮

于謙

龍樓高處綵雲飛
艮岳纔成事已非
寂寞長門金鎖合
中州無復二龍歸

春日遊三山陂

李夢陽

崔嵬艮岳他年笑
寂寞三山後代思
湖色春光淨滿眼
古城風暮幾人悲

登臺

李夢陽

梁孝臺前白杏花
眼看風落散晴沙
黃鸝恰恰誰為侶
紫燕飛飛自作家

夷門十月歌

李夢陽

小麥青青水半陂
半落不落楊柳枝
回風忽送天南鴈
恰似春江二月時

汴中元夕四首

李夢陽

花燭沉沉動玉樓
月明春女大堤遊
空中騎吹名王過
散落天聲滿汴州

二

中山孺子倚新粧
鄭女燕姬獨擅場
齊唱憲王春樂府

金梁橋外月如霜

三

四海煙花逢上元
中州行樂競千門
大江不辨魚龍夜
珊瑚寶玦是王孫

四

細雨春燈夜色新
酒樓花市不勝春
和風欲動千門月
醉殺東西南北人

汴州懷古四首

李濂

黃河迴繞宋神州
聒耳濤聲日夜流
堤柳似知朝代改
半含煙雨半含愁

二

宋室南遷王氣收
千秋遺恨大河流
可憐五國城頭月
一片清光照汴州

三

保甲青苗淚滿衣
金陵相業竟全非
傷心不見蓬萊殿
寂寞春風燕子飛

四

寒煙漠漠宜春苑
孤月朧朧萬歲峯
回首二龍沙塞遠
故宮無復六更鐘

登吹臺有感二首

李漁

臺邊草色苑邊雲
挈酒來遊白日曛
富貴可憐成一夢
疎花冷雨信陵墳

二

五柳先生盡日間
登臺一醉當登山
仰天長嘯無人識

苦憶東門老抱關

遊大道宮八首

李灝

塵海茫茫兩鬢霜
暫依丹竈惜流光
誰堪世上風波惡
獨愛壺中日月長

二

路入蓬萊紫翠多
松間雙鶴舞婆娑
逢基莫看僊人著
王質當年已爛柯

三

玄都樓觀碧霞明與客登臨坐晚晴
綠幘僊童歌勸酒
白頭道士臥吹笙

四

青鳥翩翩去不迴白雲寂寂鎖丹臺
閒來讀罷瑤池記
始信昆明有劫灰

五

載酒尋春度石梁陶然酣臥白雲房
情知鶴夢非塵夢
直把僊鄉作醉鄉

六

羽客不食煙火食夜禮瑤壇覲宸極天風吹散步虛聲
萬里雲霞分五色

七

采藥名山志未酬偶來松院愜春遊金丹口訣真難遇
幾向風塵嘆白頭

八

出世何須躡彩虹扶桑莫問海天東人間要識真僊境

汴上來看大道宮

于少保祠

李濂

使君嘉績遍三河
汴土遺民墮淚多
無限頌勛懷德意
春風吹入降神歌

六言四句

題西太乙宮壁二首

宋王安石

楊柳鳴蜩綠暗荷
花落日紅酣
三十六陂春水白
頭想見江南

二

三十年前此路父兄持我東西今日重來白首欲尋陳
迹都迷

次介甫韻題西太乙宮壁二首 黃庭堅

風急啼鳥未了雨來戰蟻方酣真是真非安在人間北
看成南

二

晚風池蓮香度曉日宮槐影西白下長干夢到青門紫

曲塵迷

詞

賀新郎

汴京懷古

明李濂

四野平如掌上荒城憑高騁望秋容蕭爽廢殿遺宮何處是極目風煙莽蒼艮岳下牧兒來往一代興亡真大夢恨當時京勑貪天賞興土木斥忠讜宋都往事增

悲慊更愁聞青城邀駕括金空帑二帝蒙塵沙漠去回首中原板蕩聽滿路胡笳哀響汴水東流還似昔間鑾

輿何日還華壤悲舊蹟動遐想

沁園春

艮岳弔古

李濂

十里青山百道流泉艮岳巧哉羨芙蓉城闕飛亭灑雪
海棠臺榭絕壑鳴雷萬態竒峯百花窈洞一片平原錦
作堆真如畫有巖巖紫翠樹樹琪瑰 東京舊事堪哀
恨誤國姦臣釀禍胎昔道君開苑毒痛四海蔡京入相
濁亂三台巢鳳樓前濯龍峽口鉦鼓喧天動地來煙塵
起慨鑾輿不返弔古徘徊

滿江紅

謁于少保祠

李濂

少保祠堂汴水上千秋
廟食紛屢舞鐘鼓娛神英靈降
陟遺愛百年留里巷清風兩袖朝京國磨嵩山千丈翠
芙蓉書勲德日正午金輪晃
彗忽見鑒輿北獨擎天
不墜伊誰之力身後寵褒公
論白向來冤憤愁雲黑嘆
鷺鷥冰上索魚噉何由得

諺云鷺鷥冰上走何處尋魚噉

臨江僊

夷門懷古

李濂

落日夷門思往事
抱關白首侯嬴信陵虛左自來迎側

身親執轡賓客四筵驚
臥內兵符初入手鐵椎俠客
功成邯鄲圍解鼓聲聲卻秦馳救趙五霸與齊名

柳稍青

梁苑懷古

李濂

落日平川梁王廢苑衰草寒煙羅綺香銷歌鐘聲散臺
殿春殘當年賓客駢闐賦雪地空留麗篇往事淒其
辭人亡矣風景依然

西江月

汴秋懷古二首

李濂

公子祠前春草屠兒墓上秋雲偶來堤口坐斜曛往事

令人悲憤 執轡高風如在竊符奇策曾聞抱關老叟
信陵君百世芳名不隕

二

五代古城殘角三山廢壘寒葩南薰門外亂啼鴉
秋色瀟灑 艮岳遺宮荆棘繁臺斷塔雲霞傷心二帝
狩龍沙落日平原駐馬

浣溪沙

汴州元夕

李濂

火樹嶙峋夜放花一天星斗爛晴霞春城月出樂無涯

蕩子陌遊歌不斷諸王輦過鼓頻撾賞心誰忍負年華

憶王孫

秋日登吹臺二首

李濂

魏侯城外古時臺雲澹天空載酒來登臨懷古興悠哉
醉金罍帽插黃花躍馬迴

二

城南霜樹晚扶疎秋滿荒臺一嘯舒坐待林梢月挂初
興何如醉墨淋漓壁上書

汴京遺蹟志卷二十四